

Drei Dörp hinger Birkesdörp...

...litt Vilvenich. Ävver vill es et nit, wat do steiht: E paar Buurehüüscher elans en Stroß un ene staatse Buurehoff em Oche-Lütticher Barock usem 18. Johrhundert. Un dann gitt et do noch e klei Kapellche, Zint Helena. Ävver dat hät et en sich, ovschüns et en enem neue Boch üvver Baudenkmöler ald nit mih ze finge es. En ener aal Oplag wor et noch dren, dateet op et 12. ov 13. Johrhundert.

Bestemmp han se dat ald erus gedon, weil unger däm Dörp "Klütte" lige un et en e paar Johr en enem große Loch verschwind. Dröm han ich dat Kapellche noch ens fotografeet, wie et esu schön em Sönnche log. Ävver wie ich dovür stund, wor ich doch jet üvverrasch: Do schung de Sonn op de Nordsigg vun dä Kirch. Eigentlich geiht dat jo gar nit, denn aal Kirche sin noh Oste orienteet!

Et gov un et gitt ävver noch e paar Usnahme. Un vill vun dä aal Kirche stundte ov stonn en enem Raster us der Römerzigg! Denne ehr "Limitatione" ginge off vun Südwest noh Nordost un vun Nordwest noh Südost: Der Vürgänger vum Bonner Müngster wor esu e Beispill, genauesu wie Zint Pantaleon en Kölle. Deswäge steiht Zint Pantaleon hügg noch esu scheiv, wie mer sinn kann. En Bonn han se dogäge em Meddelalder ehr neu Müngsterkirch quasi öm der Altar vun dä aal Kirch noh Oste erömgedriht. Un jetzt gitt et drei Dörp hinger Birkesdörp en aal Kapellche, dat och esu scheiv en der Landschaft steiht. Villleich hät dat och jet met römische Struktüre ze dun, un Zint Helena hinger Birkesdörp hät en vill längere Gescheech, wie die aal Kunshistoriker gedaach han. Et wör schön, wann su en Kirch nit en enem Klütteloch verschwinden mööt!



"Ov krütz oder quer..."

Ävver wann mer eimol anfängk, scheive Kirche ze sinn, dann süht mer bloß noch scheive Kirche! Die Kirch vun Wenau am Rand vun der Eifel bei Düre för e Beispill. Mer säht, dat et en Prämonstratenser-Abtei vun 1122 wör. Dann künnt mer eigentlich erwaade, dat en Kirch us dä Zigg korrek noh Oste orienteet wör. Dat es se ävver nit, och die Kirch vun Wenau steiht noh Nordost. Dobei es do em Wehebachdal keine Grund ze sinn, woröm die Kirch esu scheiv en der Landschaft steiht. Et fällt ävver op, dat et en Wenau en aal Üvverlivverung gitt, noh där dat Prämonstratenser-Kluster ald ene Vürgänger hatt. Dä hatt sich dann beim neue Prämonstratenser-Orde aangeschlosse. Vielleicht stundt alsu do en Wenau ald jet, wat mer för dat neu Kluster gebruche künnt un hät dröm sing neu Kirch widder scheiv gebaut.

Ungefähr genauesu wigg vun Vilvenich wie Wenau em Süde, litt em Norde Jülich. Un do hät mer nohm Kreeg beim Widderopbau unger dä große Farrkirch Zint Mariä Himmelfahrt ene "vürromanische" Vürgänger usgegrave, dä genau em Raster vun dä Hüüser us der Römerzigg stundt - noh Nordost!

Och en enem Vüroot vun Kölle gitt et noch esu en scheive Kirch: Zint Maternus en Rudekirche. Maternus wor jo der eeschte bekannte Bischoff vun Kölle. Noh der Legend sin sich domols de Kölsche un de Trierer nit einig gewoode, wo se ehre Bischoff begrave sollte - en Kölle ov en Trier. Öm dat fasszestelle, han se die Leich vun däm Bischoff en Kölle en e Böttche gelahrt. Un dann es dat Böttche vun allein der Rhing erop gefahre bes noh Rudekirche! Un do han se noh der Legend et Kapellche Zint Maternus gebaut. Die Kirch weed op et 10.-12. Johrhundert dateet, ävver wahrscheinlich gov et do och ald ene Vürgänger.

Villeich han se domols och hee aal Fundamente met ener Orienteerung noh Nordoss gebruche künne. Mer hätt eigentlich ens genau hinluure müsse, wie se do jetz die neu Huhwasserschotzmuur gebaut han. En Kölle selvs gov et üvvrigen bes zom Bau vun der Neustadt kein Maternus-Kirch. Ävver dat Zint Maternus en der Südstadt scheiv en der Stadt-Landschaff steiht, dat hät gewess bloß jet mer der Stadtplanung vum Josef Stübben ze dun!

Dr. Rudolf Schmidt

Literatur:

H. Candels: Das Prämonstratenserinnenstift Wenau, Mönchengladbach 1975

Colonia Romanica XXI, Köln 2006

Rheinische Kunststätten, 404 (F. Hilgers: Die drei katholischen Kirchen in Köln-Rodenkirchen), 441 (U. Mainzer: St. Mariä Himmelfahrt in Jülich)